



Covid19aren ondorioz kaltetuak izan diren Oiartzungo komertzio, zerbitzu eta ostalaritza jarduerak berrabiarazteko ez ohiko bigarren dirulaguntza oinarriak.

1. ARTIKULUA.- Xedea eta helburuak.

Deialdi honen xedea da Oiartzungo sukaldaritza, ostalaritza eta ostatu-jardueren esparruan dirulaguntzak ematea arautzea, jarduera horiek berraktibatze eta bultzatzeko, urriaren 26ko 36/2020 Dekretuak (azaroaren 6ko 38/2020 Dekretuak aldatua) ekarri duen egoeraren aurrean. Izan ere, dekretu horrek ostalaritza eta jatetxe zerbitzuak ixtea ekarri du, eta udalerritik kanpoko mugikortasuna mugatu du.

2. ARTIKULUA.- Onuradunak eta parte-hartze baldintzak.

Oiartzunen txikizkako sukaldaritza, ostalaritza eta ostatu jarduerak dituzten pertsona fisiko edo juridikoak, baldin eta garatzen duten jarduerari eragin badio establezimenduen nahitaezko itxiera ezartzen duen urriaren 26ko 36/2020 Dekretuak (azaroaren 6ko 38/2020 Dekretuak aldatua).

Deialdira aurkeztu ahal izango dira jarraian zerrendatzen diren jarduera-sektoreetako kide diren pertsona fisiko edo juridikoak. Zerrenda orientatiboa da eta inolaz ere ez du izaera baztertzailerik:

- Hotelak eta antzeko ostatuak.
- Taberna eta jatetxeak.
- Sagardotegiak

Establezimendu guzti hauek parte hartu ahal izango dute baldintza hauek betetzen badituzte:

- Mikroenpresa izatea, Europako Batzordeak 2003ko maiatzaren 6ko 2003/361/EE Gomendioan ezarritako definizioaren arabera. Mikroenpresatzat hartuko dira batez beste 10 langile (jardunaldi osora) edo gutxiagoko enpresak, baldin eta urteko negozio-bolumena edo urteko balantze orokorra 2 milioi eurotik beherakoa badute.
- Lehendakariaren urriaren 26ko 36/2020 Dekretuak eta hori aldatzen duen azaroaren 6ko 38/2020 Dekretuak ezarritako establezimenduen nahitaezko itxierak edota murrizketak euren jarduerari eragin izana. Murrizketa izan dela kontuan hartzeko, azaroan fakturazioa %50 edo gehiago murriztu izana ziurtatu beharko da, 2019ko azken 6 hilabeteetan fakturatutako batez bestekoarekin alderatuta.
- Gizarte Segurantzako erregimenean edo dagokion Mutua profesionalean eta Ogasunean alta emanda egotea itxiera deklaratzeko unean, 2020ko azaroaren 6an.

- Aurretik aipatutako jardueretan sartzen dela egiaztatzen duen Jarduera Ekonomikoen gaineko Zergan alta emanda egotea 2020ko irailaren 1ean, eta jardueraren lokala Oiartzunen duela egiaztatzea.
- Herritarrentzako zabalik dagoen lokal bat izatea Oiartzunen (Herrigunean, merkataritza guneeetan edo poligonoetan).
- Foru Ogasunarekiko eta Gizarte Segurantzaren Diruzaintza Nagusiarekiko eta Oiartzun Udalarekin betebeharrak egunean izatea, bai eta dirulaguntzak itzultzeko betebeharrak ere.
- Dagozkion udal-lizentziak izatea edo, halakorik ezean, lizentzia horiek eskuratzeko prozedurari hasiera ematea eskatu izana eta/edo dagokion aurretiazko jakinarazpena aurkeztu izana.
- Dirulaguntzei buruzko 38/2003 Lege Orokorraren 13. artikuluan aipatzen diren inhabilitazio egoeretako bakar batean ere ez egotea.

3. ARTIKULUA.- Diruz lagunduko diren gastuak

Laguntzaren oinarri bat ordainduko da, 800 €-koa, besteak beste, honako gastuak barneratuko dituen:

- Covid-19aren ondorioz establezimenduan egin beharreko moldaketen gastuak edo laneko moduak egokitzeko gastuak.
- Bezeroekin eta erakunde hornitzaileekin harreman berriak antolatze aldera, laneko moduak egokitzeko inbertsioak eta ekipamenduak.
- Hardwarea eta softwarea eskuratzeko berrikuntzarako.

Horrez gain, kontzeptu gehigarri hauek lagunduko dira:

- Lokalaren errentamendutik/mailegutik eratorritako gastuak, ez baldin bada eskatzailearen etxearen parte edo ez bada beste enpresa batekin partekaturiko espazio bat, ez baldin bada 2. mailara arteko ahaidetasun harremanik edo bestelako afinitaterik lokalaren errentatzailearekin, eta ez baldin bada errentatzaile gisa ageri den pertsona fisiko edo juridikoaren bazkide edo partaide.
- Langileria.

Gastuen %100 lagunduko da diruz, kontzeptu bakoitzak dituen muga barruan. Ez da onartuko 50 eurotik beherako gasturik (zergak kanpoan utzita).

Goian zerrendatutako gastuen frogagiriak aurkeztu beharko dira.

Laguntzaren oinarriari dagokion kopuruaz gain, Inoiz ez dira joko diruz laguntzeko moduko gastutzat balio erantsiaren gaineko zerga (BEZ) eta gainerako zeharkako zergak.

Osorik edo zatika diruz laguntzeko gastutzat hartuko dira 2020ko uztailaren 4tik abenduaren 31a arte egindako gastuak.

4. ARTIKULUA.- Diruz lagunduko ez diren gastuak.

Ez da diru laguntzarik emango honelako gastuetarako:

- Administrazio publikoak, haien erakunde autonomoak, enpresa publikoak eta beste erakunde publiko batzuk, bai eta elkarteak, fundazioak eta, oro har, irabazi-asmorik gabeko erakundeak.
- Zerbitzuak online edo etxez etxeko salmenta bidez lanean jarraitu dutenak, euren fakturazioa ez bazaie %50 edo gehiago murriztu azaroan, 2019ko azken 6 hilabeteetan fakturatutako batez bestekoarekin alderatuta.

5. ARTIKULUA.- Diru laguntzaren kontzeptuak eta irizpideak. Zenbatekoa.

Dirulaguntzaren zenbatekoa eskatzaileak aurkeztutako dokumentazioaren arabera finkatuko da.

5.1. Dirulaguntzak emateko irizpideak

Laguntzaren oinarria	€
Guztientzat	800

Langile kopuruaren arabera (jardunaldi osoak)	€
1-3	100
4-6	150
7-10	200

Alokairuaren/hipotekaren zenbatekoa hileko	€
<600 €	150
601-1000 €	250
>1001 €	350

Gehienez establezimendu bakoitzak 1.350 €ko dirulaguntza jasoko du.

5.2. Aurrekontua

Dirulaguntza hauek ordaintzeko, guztira, 50.000 euroko izendapena eginda dago, Oiartzungo Udalaren 2020 urteko aurrekontuko 1 0903.481.430.00.01.2020 zenbakidun partidaren kontura.

Oiartzungo Udalak baimendutako gastua handitu edo murriztu ahal izango du dauden eskaera guztiak aztertu ondoren. Horrek ez du beste deialdi bat egitea ekarriko. Hala ere, dauden eskaera guztiei erantzuteko nahikoa ez bada, modu proportzionalen banatuko da.

6. ARTIKULUA.- Eskaerak aurkezteko lekua eta dokumentazioa

Eskaerak Udaleko Erregistro Nagusian aurkeztu behar dira presentzialki edo egoitza elektronikoan Udalak horretarako jarriko dituen eskaera orrietan.

Dirulaguntzaren eskaera egiteko, dokumentazio hau aurkeztu beharko dute:

- Eskaera orri orokorra.
- Zinpeko aitorpena.
- Fakturazioa %50 edo gehiago murriztu zaienek, gertaera hori zinpeko aitorpenean jaso beharko dute.
- Langile kopurua aurkezteko RNT agiria aurkeztu beharko da.
- Identifikazioa: eskatzailearen NAN eta IFKren fotokopia.
- Dirulaguntza gehigarria justifikatzeko gastuen zerrenda (kopuru totala adierazten dela) eta ordainagiriak: alokairuarena, establezimenduan egindako moldaketa gastuena, laneko moduak egokitze gastuena,

7. ARTIKULUA.- Akatsak zuzentzea eta dokumentazio osagarria aurkeztea

Eskaerak edo horrekin batera doan dokumentazioak ez baditu identifikazio datuak biltzen, akatsen bat badu edo zerbait falta bada, eskatzaileari eskatuko zaio 38/2003 dirulaguntzak arautzen dituen Lege Orokorrak eta Udal Ordenantza Orokorrak (GAO, 2018/11/30) ezarritakoari jarraiki, hamar eguneko epean akats horiek zuzentzeko; eta adieraziko zaio ezen, hori egingo ez balu, eskaeran atzera egin duela ulertuko dela, aipatu legearen 23. artikuluan aurreikusitako moduan.

8. ARTIKULUA.- Epeak

Eskaerak 2021eko urtarrilaren 7tik urtarrilaren 22ra aurkeztu beharko dira.

9. ARTIKULUA.- Beste dirulaguntzekin bateragarritasuna

Araudi honetako dirulaguntzak bateragarriak izango dira erakunde publiko edo pribatuek xede bererako eman ditzaketen bestelako dirulaguntzekin. Bateragarritasunari buruz sortu daitezkeen zalantzak argitzeko, Oiartzungo Udalaren dirulaguntzak emateko Ordenantza Orokorrak (GAO, 2018/11/30) 14. artikuluan finkatzen dituen irizpideak jarraituko dira. Hala ere, ezin izango da Covid-19aren ondorioz sortutako galera ekonomikoa baino gehiago jaso. Halakorik gertatuz gero, itzulera prozedura martxan jarriko da Oiartzungo Udalaren dirulaguntzak arautzen dituen Ordenantzaren (GAO, 2018/11/30) IX. Tituluak arautzen duen prozedura jarraituz.



10. ARTIKULUA.- Emateko prozedura

Dirulaguntzak emateko prozedurak, Oiartzungo Udalaren dirulaguntzak arautzen dituen Ordenantzak IV. Tituluan (22-23 artikulua) zehazten diren pausoak jarraituko ditu.

Udaleko iragarki taulan eta www.oiartzun.eus web orrian ere behin-behineko proposamenaren eta behin betiko ebazpenaren berri emango da.

Dirulaguntza ordaintzea: Behin betiko dirulaguntzaren jakinarazpena eman dela jakinarazi ondoren, ordainketa tramitatuko da. Eta kontuan izango dira, halaber, Oiartzungo Udalaren dirulaguntzei buruko Ordenantzaren VII. Tituluan aipatzen diren aspektu guztiak.

Dirulaguntza eman dela jakinarazi bezain laster, dirulaguntzaren %100a ordainduko da.

11. ARTIKULUA.- Onuradunen betebeharrak

- Deialdi honetako dirulaguntzak jaso dituztenek, Oiartzungo Udalaren dirulaguntzak (GAO, 2018/11/30) arautzen dituen Ordenantzaren 6. artikulua ezartzen dituen betebeharrak bete beharko dituzte.
- Enpresa jarduerari gutxienez 6 hilabetez eustea, jarduerari berriro ekiteko baimena eman eta/edo alarma-egoera altxatzen den egunaren hurrengotik aurrera.
- Oiartzungo Udaleri jakinaraztea beste dirulaguntza, laguntza, diru-sarrera edo baliabide batzuk jaso dituela oinarri hauen xede edo oinarri berarekin.

12. ARTIKULUA.- Dirulaguntza justifikatzea

Onuradunaren betebeharrak justifikatzeko Oiartzungo Udalak egiaztatuko du ofizioz Gizarte Segurantzako erregimenean edo dagokion mutualitate profesionalean alta emanda dagoela justifikazioa aurkezten den egunean eguneratutako pertsona fisikoa edo administratzailea.

Dirulaguntzaren onuradunak fakturazio murrizpena justifikatzeko Oiartzungo Udalaren esku jarriko ditu, honek hala eskatzean, 2019ko azken 6 hilabetetako eta 2020ko azken 6 hilabetetako faktura liburuak edo faktura zerrendak eta hauei loturiko BEZ-aitorpenak.

Betebeharrak betetzen ez badira dirulaguntza itzuli egin beharko da Oiartzungo Udalaren dirulaguntzak (GAO, 2018/11/30) arautzen dituen Ordenantzaren IX. Tituluak arautzen duen prozedura jarraituz.

13. ARTIKULUA.- Araudi osagarria

Deialdi honek ezartzen ez duenari dagokionez, aintzat hartuko da Oiartzungo Udalaren laguntzak arautzen dituen Ordenantzak (GAO, 2018/11/30) ezartzen duena eta Herri Administrazioetako dirulaguntzak arautzen dituen 38/2003 Legearen xedapenak.